

খুশি হতাম যদি...

Anika Tuba

2015-08-13 07:04:00 +0600 +0600

3 MIN READ

এক বোনকে চিনি। ভীষণ অমায়িক। ঘরের কাজ-রাগাবাগ সব তিনিই সামলান। কঠোর পর্দা করেন। সুন্নাতের প্রতি তাঁর ভালোবাসা দেখে অবাক হওয়ার মতো! তাঁর বাসায় যেবার গেলাম, ছিমছাম ঘর। জানালার পাশ দিয়ে গাছের ফাঁকফোকর গলে বাইরে দেখা যায় না। তিনি বললেন, "আমি খুব চিন্তায় ছিলাম বাইরে থেকে আমার ঘরে নজর আসবে। আল্লাহ তা'আলা কী সুন্দর ব্যবস্থা করে দিলেন! এই গাছগুলোর জন্য কিছুই দেখা যায় না।" আপুর বয়স তিরিশের কাছাকাছি। নানা কারণে বিয়ে হচ্ছে না। এক একবার বিয়ের কথা ওঠে; বয়স, পড়াশোনা ইত্যাদি দেখার পর পাত্রপক্ষ পিছিয়ে যায়।

আরেক বোনকে চিনি। কিছুদিন হলো ডিভোর্স হয়েছে। আগের স্বামীর পরিবার জাদুটোনা করার মতো নিচু পর্যায়ে নামতেও দ্বিধা করে নি। এখন তার দ্বিতীয় বিবাহের জন্য কাউকে খুঁজে পাওয়া যাচ্ছে না। একজন নারীর তালাকের পর শুধু মানসিক ও শারীরিক চাহিদা থাকে না, সেই সাথে যুক্ত হয় ভয়াবহ বিষমতা আর একাকিত্ব! এই একাকিত্ব পূরণ করতে পারে একজন পুরুষ। কিন্তু তালাকপ্রাপ্ত নারীর জন্য এই সমাজে পাত্র পাওয়া দুষ্কর। বিয়ের বাজারে কেউ-ই "ঠকতে" চায় না।

আমরা বহুবিবাহের পক্ষে সমর্থন জানাই। আমাদের ভাইয়েরা যখন বহুবিবাহের কথা তোলেন, আমরা তাতে শর্তযুক্ত করি না। কিন্তু আমাদের বোনেরা যখন বিয়ের বয়স পেরিয়ে জীবনের সবচেয়ে সুন্দর সময়টা অপূর্ণতায় কাটিয়ে দেন, তখন তাদের জন্য ভাইয়েরা এগিয়ে আসেন না। যে বোনটি তালাকের পর একাকী রাত কাটায়, যার বিছানায় শুধুই অশ্রুর দাগ, তার বেদনা ভাইদেরকে স্পর্শ করে না। খুব খুশি হতাম যদি তাদের কষ্টটা আমাদের ভাইয়েরাও বুঝতেন। খুশি হতাম, যদি আমাদের ভাইয়েরা বিধবা বোনদের জন্যেও সোচ্চার হতেন যেমনটি বহুবিবাহের পক্ষে হয়ে থাকেন। ভাইদের দায়িত্ব তো কেবল বহুবিবাহ নিয়ে হাসিঠাট্টা করেই শেষ হয়ে যায় না...।

অসাধারণ কিছু ভাইও আছেন। হাতেগোনা দু-একজন। নবীজি (সাল্লাল্লাহু আলাইহি ওয়া সাল্লাম) এর আদর্শ বুকে নিয়ে চলতে চান। খালি স্বার্থের জন্য হাদীসের ব্যবহার করেন না। অপছন্দের কাজটিও করেন -- আল্লাহর সন্তুষ্টির আশায়! তারা বিধবা বোনটিকে বিয়ে করেন, তালাকপ্রাপ্ত বোনটিকে সসম্মানে নিজের স্ত্রী করে নেন, কনের বয়স কতো বেশি সেদিকে ফিরে তাকান না। আমরা চাই, আমাদের ভাইয়েরা আরও এগিয়ে আসুক! একজন খাদিজার খোঁজে সারাটি জীবন কাটিয়ে দেওয়া যায়। সেই খাদিজাকে পাবার আশায় প্রথম ধাপটি না নিতে পারলে লজ্জা। আমরা চাই, আমাদের ভাইয়েরা সমাজের প্রথা ভেঙে নতুন করে বিবাহের সংজ্ঞা রচনা করবেন। বিধবা, তালাক-প্রাপ্ত, বয়সী বোনদেরকে তারা করুণার চোখে নয়, তাকওয়ার বিচারে বাকি বোনদের সাথেই সমানে-সমান রাখবেন।

বিবাহের সময় কম বয়সী, সুন্দরী, লেখাপড়া জানা, উচ্চ স্ট্যাটাস সম্পন্ন নারীর খোঁজ করতে কোনো বাধা নেই। তবু আমরা চাই, আমাদের ভাইয়েরা সৎ কাজে, সাহসে, উচ্চ-মানসিকতায় প্রতিযোগিতা করুক। আমরা চাই আল্লাহর রাহে আত্মত্যাগে আমাদের ভাইয়েরা এগিয়ে থাকুক। আমরা চাই, বিয়ের বাজারে দামি কনেটিকে বিয়ে করার সুযোগ থাকা সত্ত্বেও আমাদের ভাইয়েরা একজন কষ্টে-থাকা বোনের মুখে হাসি এনে দিক -- শুধুই আল্লাহর সন্তুষ্টির আশায়!

আর যারা বহুবিবাহের পক্ষে কথা বলেন, তাদের ব্যাপারে আমাদের আশা আরও বেশি। আল্লাহ তা'আলা অধম বোনের লেখার মাধ্যমে ভাইদেরকে ভালো কাজে উৎসাহিত করবেন - এই প্রত্যাশায় রইলাম। আল্লাহ্মা আমীন।